

## **Teks Ucapan**

**PROF. DR. D KAMARUDIN D MUDIN  
NAIB CANSOLOR  
UNIVERSITI MALAYSIA SABAH**

**SEMPENA MAJLIS SAMBUTAN AIDILFITRI  
RAYA@UMS**

**13 Julai 2017 (Khamis) | 09.45 Pagi  
Kompleks Dewan Kuliah Pusat Ke-2  
Universiti Malaysia Sabah**

Bismillahirrahmanirrahim  
Assalamualaikum Warahmatullahi  
Wabarakatuh, Salam Sejahtera dan Salam  
Negeraku Malaysia

## **Salutasi**

Tuan Yang Terutama Yang Di-Pertua Negeri  
Sabah merangkap Canselor UMS, Tun Datuk  
Seri Panglima (Dr.) Haji Juhar bin Datuk Haji  
Mahiruddin

*(Salutasi terkini akan dimuktamadkan)*

Alhamdulillah, pujian dan kesyukuran dipanjatkan ke hadrat Allah SWT. yang memberikan ruang masa untuk kita sama-sama berkumpul pada pagi ini bagi merai dan menyerikan lagi Majlis Sambutan Aidilfitri RAYA@UMS yang disambut meriah dalam kesederhanaan. Setinggi-tinggi ucapan terima kasih kepada Tuan Yang Terutama Yang Di-Pertua Negeri Sabah, Tun Datuk Seri

Panglima (Dr.) Haji Juhar bin Datuk Haji Mahiruddin yang sudi meluangkan masa untuk turut sama meraikan majlis RAYA@UMS kita pada kali ini. Untuk makluman Tun dan dif-dif terhormat, RAYA@UMS ini merupakan majlis Rumah Terbuka Naib Canselor yang dianjurkan bersama dengan Rumah Terbuka UMS yang kali terakhir diadakan adalah pada tahun 2014.

## **Hadirin Hadirat yang saya muliakan,**

1. Sebulan kita berpuasa di bulan Ramadan, menahan lapar dan dahaga, mengawal nafsu dan kehendak, dan akhirnya Syawal menjelma bagi meraikan kemenangan umat Islam yang menjalani ibadah puasa dengan penuh kesabaran. Saya berdoa semoga kita semua mencapai segala matlamat yang diinginkan sepanjang bulan Ramadan dan

mudah-mudahan Allah SWT memberikan rahmat yang melimpah-ruah kepada kita semua. Sesungguhnya, panjang umur dan murah rezeki, Insya-Allah mudah-mudahan kita dipertemukan lagi dengan Ramadan pada tahun depan. Bulan Ramadan mengajar kita untuk banyak bersabar dan pengajaran ini setidaknya kita bawa ke dalam kehidupan kita pada bulan-bulan yang lain. Marilah kita terus istiqamah untuk memikul

amanah yang telah diberikan dalam setiap pekerjaan yang kita lakukan dengan penuh keikhlasan.

2. Sesungguhnya, majlis ini berjaya menyatukan kepelbagaian agama dan budaya, menunjukkan keharmonian berbilang latar belakang kaum dan kepercayaan, yang akhirnya mencetuskan kesatuan dan muhibbah dalam kalangan warga. Betapa saya

terharu dan sangat-sangat bersyukur kerana kita dipertemukan di dalam majlis ini.

3. Majlis rumah terbuka seperti ini tidak lain tidak bukan bertujuan mengeratkan jalinan ukhuwah, persaudaraan dan perpaduan sesama kita dan organisasi sama ada dari dalam mahupun dari luar UMS. Majlis sebegini boleh dijadikan batu loncatan untuk kita merapatkan kembali hubungan, saling bermaafan dan



bersedia membuka lembaran baru bagi mewujudkan permuafakatan yang lebih utuh lagi. Berbeza pendapat adalah lumrah dan harus dimanfaatkan menjadi percambahan idea dan ilmu untuk menghasilkan keputusan yang terbaik dan memberikan kemaslahatan kepada masyarakat dan negara, insya-Allah.

**Tuan-tuan dan Puan-puan yang saya hormati,**

4. Selaku tuan rumah, banyak juadah yang kita sediakan. Juadah-juadah hari ini diusahakan oleh Jabatan, Fakulti, Pusat, Institut, Unit dan juga persatuan-persatuan dan kelab-kelab yang ada di UMS. Menu tradisi ada, menu moden pun ada. Sambil menikmati juadah, sudah pasti anda boleh bertegur sapa, bertanya khabar dan berbual-bual secara santai.
5. Terdapat sebanyak 31 buah gerai makanan ketika ini. Antara juadah yang

disediakan ialah kelupis, buras, nasi linopot, kambing golek, soto, laksa, spaghetti, rendang, leman, buah-buahan, kek, nasi beriani dan banyak lagi. Apapun, makan-makan juga, kesihatan perlu dijaga.

Hadirin hadirat sekalian,

6. Sebelum mengakhiri ucapan ini, saya selaku Naib Canselor yang mewakili seluruh warga UMS sekali lagi mengucapkan terima kasih atas kesudian

Tuan Yang Terutama Tun dan dif-dif terhormat yang sudi meluangkan masa untuk hadir, seterusnya menyerikan lagi majlis RAYA@UMS pada hari ini. Mohon maaf andai terdapat kekurangan dan kekhilafan sepanjang majlis ini. Kepada warga UMS, teruskan kesatuan dan muhibbah kerana anda adalah kekuatan sebenar UMS. Akhir kata daripada saya, Selamat Menyambut Aidilfitri, Maaf Zahir dan Batin.

Sekian, terima kasih.

Wassalamualaikum  
wabarakatuh

warahmatullahi